

Wan Spesel Presen

"Hemia i mas Tabu Spirit ia," Mehrimah i tingting.

I kam long Gretchen Picklesimer Kinney

(I kamaot long wan tru stori)

Stori ia i hapen long Franis.

“Mehrimah! !Fatima! “Ol misinari oli kam” mama i singaot.

Mehrimah i sarem buk blong ol skripja stori blong hem mo i ron i go long salon. Ol misinari oli bin stap tijim famli blong olgeta abaot Jisas Kraes. Mehrimah mo famli blong hem bae oli baptaes i no long taem. !Hem i no save wet!

Mehrimah i sidaon wetem famli blong hem.

“Tedei bae yumi tokbaot Tabu Spirit,” Elda Moeda’i i

talem. “Hem i helpem yumi blong filim pis mo kamfot we i kam long Papa long Heven.”

“Hem i leftemap tingting blong yumi tu blong mekem ol gudfala samting,” Elda Campbell i joenem. “Mo i helpem yumi blong save wanem i tru. Maet yu bin filim Tabu Spirit finis bifo.”

Mehrimah i tingbaot taem hem i bin lanem abaot Buk blong Momon. Hem i bin filim pis mo hapi.



Hemia i olsem wanem hem i bin save se i tru. ?Hemia nao Tabu Spirit?

“Afta we yu kasem baptaes, bae oli givim presen we i Tabu Spirit,” Elda Moeda’i i talem. “Hemia i minim se Hem i save stap *oltaem* wetem yu blong helpem yu mo lidim yu.”

“Long wik ia, wajem gud ol tingting mo filing blong yu,” Elda Campbell i talem. “Lukaotem ol taem we Tabu Spirit i stap toktok long yu.”

Long naet ia long taem blong famli prea, Mehrimah i luksave olsem wanem hem i bin filim insaed long hem. Hem i filim kwaet mo pis. I kolosap olsem se wan man i stap haggem hem strong. *Hemia i mas Tabu Spirit ia*, hem i tingting.

Long jos long Sandei, Mehrimah i lisiin long wan singsing abaot Jisas Kraes. Hem i filim hapi. I mekem hem i wantem blong helpem ol nara man. *Hemia i mas Tabu Spirit tu ia*, hem i tingting.

Bifo hem i go silip, Mehrimah i ridim buk blong ol skripja stori blong hem. Sista blong hem Fatima, i askem sapos hem i save rid smol tu. Mehrimah i talem no.

Mehrimah i gohed blong stap rid. Be hem i filim nogud from hem i no serem buk.

“Mi sori,” hem i talem long Fatima. “?Yu wantem yumitu rid tugeta?”

Fatima i sidaon narasaed long hem. Tufala i gat wanwan janis blong rid. Mehrimah i filim wom mo hapi insaed. *Hemia i mas Tabu Spirit ia*, hem i tingting.

Long en, dei blong baptaes blong olgeta i kam. Mehrimah mo famli blong hem i go long Jos bilding mo jenis i go long ol waet klos.

Oli baptaesem Mehrimah faswan. Wota i kolkol, be hem i glad blong mekem wan kavenan wetem Papa long Heven. Mama i putum wan tawel raon long hem. Afta hem i wajem Mama, Papa, mo Fatima oli kasem baptaes.

Mehrimah i jenis i gobak long ol drae klos blong hem. Naoia i taem blong oli konfemem hem.

Ol misinari oli putum han antap long hed blong Mehrimah. “Mifala i konfemem yu i kam wan memba blong Jos Ia blong Jisas Kraes blong Ol Lata-dei Sent,” Elda Campbell i talem, “ mo talem long yu: kasem Tabu Spirit.” Mehrimah i filim wom long ful bodi blong hem taem hem i lisiin long ful blesing ia.

Afta we oli konfemem Mehrimah, Mama i haggem hem. “?Yu filim olsem wanem?”



“Gud tumas,” Mehrimah i talem. “Afta we oli putum ol han blong olgeta long hed blong mi, mi filim wan samting, mo i filim olsem pis.” Hem i smael. “Mi filim olsem wan man i stap talem long mi blong laef long wan gudfala laef, blong helpem ol pipol, mo blong obei long ol komanmen.”

“?Yu save wanem yu bin stap filim?” Mama i askem.

“Yes, mi save,” Mehrimah talem we oli ae blong hem oli stap saen. “!Hemia i bin Tabu Spirit!” ●

TABU SPIRIT

santaem oli singaotem Tabu Spirit se “Spirit.” Hem i karem i kam long yumi ol mesej we i kam long Papa long Heven mo Jisas Kraes. Hem i kamfotem yumi mo tijim yumi olsem wanem blong mekem ol gudfala desisen. (Luk long Doktrin mo Ol Kavenan 79:2.) Tanem i go long pej 21 blong lanem abaot sam wei blong save harem voes blong Hem.